

Aendomq Iqetet Cauhbaenz Aen Cehgenh Hung Banggungz

—Diuzroen Densangh Banggungz Liuz Canghleij

De ndwn youq gwnz aendaiz lingxciengj aen doxdax dajveh huq cauhamoq “funghvuengz gim” hoih gaicawx gunghyibinj daengx guék gaiq daih 53, song fwngz bungj ciengjbaiz, naj riunyunyum.

De couhwdg Vangz Siufwnh, boux mehmbwk baez daihnduj raen aendomq couh maij hwnj aendomq ndeu, gvan de mingzcoh heuhguh Liuz Canghleij, dwg boux cungjinghlij Aen Gunghswh Mizhanh Vwnzva Aendomq Diengzsiuyin Si Cingsih.

Bi 1984 ndwen 2, Liuz Canghleij youq lajmbanj Liuzcwngz Sanhdungh ranz bouxndangcanz ndeu okseng. Bi 2009 satbyai, ginggvaq vunzsug gaisau, madaengz Cingsih Sinfazlij guhhong, baez di baez di boiz gij cienz daigvanj banghag liux, aen davaih daxboh goj yw ndei lo, de couh cawx ranz baenzranz, song gvanbaz couh youq aensingz henzguck gvaq hwnj gij ndwenngoenz cwxcaih onjdingh.

Dwen daengz gij yienzfaenh song gvanbaz Liuz Canghleij caeuq aendomq, aeu daj baez gihvei dinglingz ndeu gangj hwnj cij ndaej. Haujlai bi gaxgonq miz ngoenz ndeu, Liuz Canghleij daiq mehyah de bae Giucouh guhcaemz, mehyah de maij aendomq fwngzguh Giucouh neix dangqmaz, cungj sij mbouj ndaej cuengq fwngz. Yawj mehyah baenz-neix maij, ngoenz haenx, Liuz Canghleij couh cawx hawj mehyah song aen domq daiq ma ranz. Daj ngoenz haenx hwnj, song gvanbaz youq doxcaez ganggoj, ciengzseiz ganggangj couh gag gangj daengz aendomq lo. Baez ndaej hoengq, mehyah couh ra cimmae ma hag siuq guh aendomq. Cungj naeuz maij boux vunz ndeu couh maij daengz gij de maij, Liuz Canghleij couhwdg cungj vunz yienghneix, vihliux hauejcoengh gij gyaemzmai mehyah, leihyungj gij bonjfaenh caixhangz, dajveh aenbouq gwnz muengx daih’ it ciuhvunz bonjfaenh, cienmonz yungh daeuj gai gij domq mehyah gag siuq guh haenx.

Aenvih gij domq Cingsih miz daegsaek minzcuz naekna, hawj vunz roxnyinh saenzmaed dangqmaz, aenbouq gwnz muengx ngamq hai mbouj geijlai nanz couh miz vunz cawx domq lo, ngamq hainduj gij domq mehyah gag siuq guh haenx lij doh gai, hoeng riengzlaeng miz vunz cawx lai le, gij domq mehyah gag siuq guh haenx couh mbouj doh gai lo. Aenvih aendomq gizgiz cungj dwg yungh fwngz bouxvunz ma guh liux, gij gocwngz siuq guh aendomq saepsoiq dangqmaz, aen domq gai cibgeij maenz ngaenz couh aeu yungh seiq haj ngoenz cij guh ndaej baenz, mehyah fwngz riengj baenz ngoenz baenz hwnz



▲ Liuz Canghleij vinx bouxhek cawx aendoma.

siuq guh hix mbouj doh vunz cawx. Vihliux gaijgez aen vwndiz mbouj doh gai, Liuz Canghleij hainduj buenq aendomq lo, de youq dieggoek aendomq Cingsih—Giucouh baenz ranz baenz ranz bae soucawx aendomq, camhseiz hoizrwnh le aen vwndiz mbouj doh gai.

Bi 2013 ndwen 11 ngoenz 11, Liuz Canghleij swz gij hong gungh-gvang giyez cienzhong ndaej haemq lai haenx bae, aeu ok gij cienzrom bonjfaenh sojmiz nem 10 fanh maenz ngaenz caeuq beixnuengx baengzyoux ciq haenx cucwz aen giyez daengx guék dandog aeu aendomq guh cujyau ginghyingz yezvu—Aen Gunghswh Mizhanh Vwnzva Aendomq Diengzsiuyin Si Cingsih.

“Vangjdoxlien + ” seizdaih moq cap fwed hawj densangh lo, gij cwngcwz bangfuz densangh guékgya caeuq gij saehnieb Liuz Canghleij ngad ok feizmbaw. Bi 2015, Cingsih Si aeundaej aen yienh guhyiengh denswj sanghvu hauej lajmbanj, giekdae hwnjguh ndaejdaengz laebcaez lo. Aen Gunghswh Mizhanh Vwnzva Aendomq Diengzsiuyin Liuz Canghleij daih’ it seizgan capyouq Aen Cungsing Fugsah Denswj Sanghvu, baengh cwngfuj gungganq caeuq dajveh senhconz binjbaiz, gyahwnj Liuz Canghleij gag gaenxmaenx camgya gak cungj hozdung siugai, yaepyet, mingzdaeuz aendomq hoenghwdhwd, mingzcoh cienz doh ndaw guék rog guék. Bi 2016, 2017, Liuz Canghleij caijsoq ndei ndaej hwnj aen daizheiq aen vanjvei lienzvuen ndwencieng Cunghyangh Densidaiz caeuq camgya aen daihingz hozdung “veh bangxdat Byaraiz” youq Dujwjgiz bauq feihyiz.

Aendomq lij ndaej dangguh gij huq geiqniemh gonqlaeng soengq hawj Yauz Mingz, Daigoz Sihlinzdungh gunghcuj daengj doengh boux mizmingz ndaw guék rog guék neix, ndaej bouxhek gak gyaiq gyaemzmai.

Daj “aen ranziq laepngau” buen baedaengz aen ranzungghcangj youh gvangq youh ronghsag, gij vanzging caeuq dieg guhhong ndaejdaengz cienjbienq ndei, song gvanbaz Liuz Canghleij miz le gihvei cuengq fwngz daihdamj guh, gij hwnghat aen gunghswh miz le roennaj gvangqlangh. Gij huq aendomq cawz gai bae doh daengz daengx guék le, lij gai bae daengz Daigoz, Vwnzlaiz, Feihlizbinh, Meijgoz doenghgiy guékgya neix, gij soqliengh gai okbae goj bi lai gvaq bi, bi 2017 gungh gai ndaej 140 lai fanh maenz ngaenz, daengz seizneix gaenq gai ndaej mauhgvaq 200 fanh maenz ngaenz.

“Gwn raemx naemj goekraemx”, Liuz Canghleij youq seiz leihyungj gij huq minzcuz Cingsih canh ndaej cienz, mbouj lumz hoizbauq lwgminz Cingsih, gaenxmaenx yienjwngq iuheuh, saedhengz densangh caeuq banggungz cingcinj doiqciep, camgya banggungz gunggeng, ngeng coh bae ranzungzhoj soucawx aendomq. Vihliux hawj gij caetliengh aendomq ranzungzhoj guh haenx habgek, Liuz Canghleij leihyungj aenranz songyauq cungsing fugsah goenggungh guh le 3 baez son’ gyauq miz 65 vunz camgya, mauhgvaq 200 baez daiq mehyah bae daengz ranzungzhoj hawj gyoengqde siuq aendomq, gaem fwngz son gyoengqde siuq aendomq. Seizneix, diengzsiuyin moix ngoenz cingj 5 boux mehdajsiuq, lij caeuq 30 lai ranz



▲ Vangz Siufwnh cingq guh aendoma.

ranzungzhoj laeb dangjan laeb gaj Giucouh, Ginhlungz, Dunghli daengj doengh aen mbanj neix ciem dinghdan, hawj vunzungzhoj youq bakdou ranz miz hong guh doengzseiz moix vunz bingzyaenz moix bi demsou 6000 maenz ngaenz baedauc.

Geij bi neix daeuj, Aen Gunghswh Mizhanh Vwnzva Aendomq Diengzsiuyin Liuz Canghleij gonqlaeng aeundaej le bouxdingjah yienghsiengq aendomq Cingsih, daudwz mozfan lauxsaed soujsaenq Si Cingsih, “cib aen densangh ndei” Si Baksak daengj doenghgiy mingzdaeuz ndei neix, Liuz Canghleij hix ndaej Cingsih Si Yinzminz Cwngfuj bingz baenz gaiq daih’ it “cib boux bouxcz maen’ ak Cingsih”, gij domq siuqdoi mehyah de siuq guh haenx youq aen doxdax dajveh huq cauhamoq “funghvuengz gim” hoih gaicawx gunghyibinj daengx guék gaiq daih 53 aeundaej ciengjgim “funghvuengz gim”, bi 2018 ndwen 11 camgya aen hanghmoeg dajsiuq bi 2018 Gvangsijh gaiq daih’ it “sim mehmbwk coh dangj seizdaih moq laebgoeng” mehmbwk doxdax dinfwngz guhhong aeundaej mingz daihngieih, bi 2018 Aen Gunghswh Mizhanh Vwnzva Aendomq Diengzsiuyin ndaej dingh baenz “aen cehgenh banggungz”.

Saenq Liuz Canghleij youq ndwenngoenz ngoenzlaeng, itdingh caeuq mehyah de doxcaez, daiq daengx ndang mingzdaeuz miznaj caeuq aen cwngheuh “aen cehgenh banggungz”, angqyangz laebdaeb roengzbae, daiqdoengh engq lai vunz cau ok diendeih engq gvangq.

(Cau Dungjij raiz Dahdingz hoiz)